

Na caminda pa nos 60 Aña

Tende canto di Trupialen



ORANJESTAD - "De Trupialen" a ser funda 13 di Januari 1953 bao direccion di Frère Alexius y Frère Antonius. E prome grupo tabata consisti di mas o menos 40 pa 50 mucha homber di Dominicus College y La Salle School. Nan tabata hopi disciplina y tabata train tin biaha tres pa cuater biaha pa siman despues di scol. Ya cu nan tabata preparando pa nan prome

presentacion den luna di Mei. Manera tur grupo De Trupialen tambe tabata tin nan tema musical (herkenningslied) e conocido HOOR DE TRUPIALEN ZINGEN: Ken ta cordal Ban canta cu mi: Hoor de Trupialen zingen Luister naar ons vrolijk lied. Zingen over alle dingen, die men zo al hoort en ziet. Luister naar de Trupialen,



kun je met ons vrolijk zijn, want we blijven steeds herhalen: zingen maakt het leven fijn. (fluit....) Hoor de Trupialen (fluit....) Hoor de Trupialen.

Pa recompensa e muchanan pa nan tremendo esfuerso y participacion na tur e repeticionnan Frère tabata hiba nan riba Diasabra bay pasa dia na lama, na Pova beach.

Asina e dia tabata yegando pa nan prome presentacion den publico. Preparacionnan tabata den ful swing. Shon Quita tabata na encargo di e kostuumnan. Carchinan di entrada y pamfletanan tabata ser prepara. E muchanan mes tabata pasa cas pa cas ta parti pamfleta y bende carchi.

Y bo sa cuanto e entrada tabata? E prome dia e entrada tabata Afls. 3.- y presentacion pa mucha 0.50. Despues pa e otro presentacionnan nan a baha e prijs pa 1.50.

Pues e prome presentacion tabata diadomingo 10 di Mei 1952 na Sociedad Bolivariana. E di dos dia 13 di Mei cual tabata un presentacion pa mucha y e di tres tambe tabata un matine dia 20 di Mei.

E show tabata yama "Un gran velada". E programa a cuminsa cu Hoor de Trupialen zingen, sigui pa Aruba, mijn vaderland, Jagerslied y Naar luilekkerland.

Despues a sigui cu un schets titula: Con nan ta haya un noticia den corant. Despues a sigui De Kikkers. Sigui pa otro schets cortico "Dilanti di Hues" presenta pa H. Rosen-

stand y A. Quilotte. A sigui Huiswerk, Drop di tosa, Oloshi kens y solo di fluit. Pauze.

Y despues di pauze a ser presenta e tremendo Operette "Hans en Grietje" Un conocido sprookje conoci pa tur e muchanan den sala y cu a sinta wak e presentacion cu boca habri. Un Operette cu e personahe nan conoci Hans en Grietje, Heks y kabouternan.

Corantnan tabata yen cu elogio y bunita palabra pa e tremendo presentacionnan di De Trupialen. Pero presentacionnan no a caba aki, A sigui pa Santa Cruz den Club San Martin dia 31 di Mei. 14 y 17 di Juni den club Santa Cecilia na San Nicolas. y dia 28 di Juni den e distrito di Noord.

Asina e muchanan di Trupialen a termina prome cu vakantie cu nan presentacionnan. Nan tabata hopi satisfecho y orguyoso di cual nan a siña den corto tempo: canto, actuacion, pero tambe disciplina y puntualidad. Asina nan a drenta vakantie pa tuma un descanso, y unda cu nan a bay tur hende tabata bisa ata e muchanan di Trupialen. E streaman nobo riba Aruba. Nan tabata sinti nan mes manera artista. y nan a disfruta di un dushi vakantie pa cuminsa atrobe despues yen di gana y alegria.

Lo continua.....
Pa mas informacion, e-mail: detrupialenaruba@hotmail.com of subi riba facebook: detrupialenaruba. Riba e combinacion di foto por tira un bista di e actividadnan cu e muchanan tabata haci durante e prome añanan di De Trupialen. □